

善力。墮水漂去。而不沒死。於河下流。有國王崩。彼國相師。推求國中。誰應為王。遙見水上。有黃雲蓋。相師占已。黃雲蓋下。必有神人。遣人水中。而往迎接。立以為王。王之舊婦。擔彼別人。展轉乞索。到王子國。國人皆稱。有一好婦。擔一別婿。恭承孝順。乃聞於王。王聞是已。即遣人喚。來到殿前。王問婦言。此別人者。實是爾夫不。答言。實是。王時語言。識我不也。答言。不識。王言。汝識某甲不。諦向王看。然後慚愧。王故慈心。遣人養活。佛言。欲知王者。即我身是。爾時婦者。旃遮婆羅門女。帶木杆。謗我者是也。爾時別手足者。提婆達多是。

一三三、須達長者婦供養佛獲報緣

昔佛在世。須達長者。最後貧苦。財物都盡。客作傭力。得三斗米。炊作飲食。時炊已訖。值阿那律來從乞食。須達之婦。即取其鉢。盛滿飯與。後須菩提。摩訶迦葉。大目犍連。舍利弗等次第來乞。其婦悉亦各取其鉢。盛飯施與。末後世尊。自來乞食。亦與滿鉢。於是須達。在外行還。從婦索食。婦答夫言。其若尊者阿那律來。汝當自食。施於尊者。答言。寧自不食。

當施尊者。若復迦葉大目犍連須菩提舍利弗等。乃至佛來。汝當云何。答言。寧自不食。盡以施與。婦語夫言。朝來諸聖。盡來索食。所有之食。盡用施之。夫語婦言。我等罪盡。福德應生。即發庫中。穀帛飲食。悉皆充滿。用盡復生。

二四、娑羅那比丘為惡生王所苦惱緣

昔優填王子。名曰娑羅那。心樂佛法。出家學道。頭陀苦行。山林樹下。坐禪繫念。時惡生王。將諸娑女。巡行遊觀。至於此林。頓駕憩息。即便睡眠。諸娑女等。以王眠故。即共遊戲。於一樹下。見有比丘坐禪念定。往至其所。禮敬問訊。爾時比丘為其說法。王後尋覺。求覓娑女。遙見樹下。有一比丘。顏貌端正。其年壯美。諸娑女等。在前聽法。即往問言。汝得阿羅漢不。答言。不得。得阿那含不。答言。不得。得斯陀含不。答言。不得。得須陀洹不。答言。不得。得不淨觀不。答言。不得。王便大瞋。作是言曰。汝都無所得。云何以此生死凡夫。與諸娑女。共一處坐。即捉搗打。遍身傷壞。諸娑女言。此比丘無過。王轉增瞋恚。又見被打。皆啼哭懊惱。